

II

TEXTO DEL PROYECTO DE LEY EN EUSKERA /

LEGE PROIEKTUAREN TESTUA EUSKARAZ.

PROYECTO DE LEY DE LA AGENCIA DE CALIDAD DEL SISTEMA UNIVERSITARIO VASCO.

EUSKAL UNIBERTSITATE SISTEMAREN KALITATE AGENTZIARI BURUZKO LEGE PROIEKTUA.

# EUSKAL UNIBERTSITATE SISTEMAREN KALITATE AGENTZIARI BURUZKO LEGE PROIEKTUA

## ZIOEN AZALPENA

Europako Goi-mailako Hezkuntza Esparrua funtsezko erreferentzia bat da gure herrian goi-mailako irakaskuntza garatzeko. Proiektu horretan, funtsezko osagaitzat hartzen da unibertsitatearen jardueraren kalitatea bermatzea, eta, horretarako, kalitatea ebaluatu eta egiaztatzeko agentziak sortu dira.

Unibertsitateei buruzko Lege Organikoak ezartzen duenez, unibertsitate-politikaren funtsezko helburuetako bat unibertsitateen kalitatea sustatu eta bermatzea da. Lege horretan bertan, agentziei unibertsitatearen jarduera ebaluatzeko ardura ematen zaie.

Euskal Autonomia Erkidegoan, Espainiako Konstituzioak eta Euskal Herriaren Autonomia Estatutuak irakaskuntzari dagokionez ematen dituzten eskumenekin bat etorriz, otsailaren 25eko 3/2004 Legea, Euskal Unibertsitate Sistemarena, onartu zen (2004ko martxoaren 12ko EHAA, 50. zenbakia). Lege horrek, 79. artikuluan, Euskal Unibertsitate Sistemaren Kalitatea Ebaluatu eta Egiaztatzeko Agentzia sortu zuen, eta Agentzia 2005eko apirilaren 4an jarri zen martxan, Administrazio Kontseilua eratu zenean.

Bolognako adierazpena sinatu zuten Europako hezkuntza-ministroek *European Network for Quality Assurance in Higher Education* (ENQA) erakundea gonbidatu zuten 2003an Berlingen egindako bilerara, kalitatea ziurtatzeko beste elkarte batzuekin batera, "*kalitatea bermatzeko irizpide, prozedura eta jarraibideen multzo adostu bat*" prestatzeko, eta "*aztertzeko zer bitartekok bermatuko duten ikuskapen-sistema egoki bat, kalitate-berme bikoitzen bidezkoa, edo/eta zer bitarteko behar dituzten ziurtapen-agentzia edo -erakundeek, 2005ean ministroei erabaki horien berri emateko, Bolognako Jarraipen Taldearen (Bologna Follow-Up Group) bitartez*".

Gonbidapen horren emaitza izan zen *Europako Goi-mailako Hezkuntza Esparruan kalitatea bermatzeko irizpideak eta jarraibideak* txostena, 2005ean onartua.

Dokumentu horren hirugarren atalean adierazita daude zein diren gomendatutako Europako irizpide eta jarraibideak kalitatearen kanpo-bermerako agentzientzat, irizpide eta jarraibide horiek osatzen baitute agentzia orok Europako esparruan homologazioa izateko jarraitu beharreko oinarritzko gida.

Agentziak maila ofiziala izango du eta erakundeak ebaluatzeko eginkizunak beteko ditu; egindako lanen berri emango die bai Gobernuari eta baita gizarteari ere; argi eta garbi eta bere kabuz definitu behar du bere zeregina, eta behar beste giza baliabide nahiz baliabide material izango ditu zeregin hori betetzeko. Zeregin hori gobernu- eta unibertsitate-agintarietatik aparte egin behar da, prozedura eta irizpide objektibo, publiko eta nazioartean parekatzeko modukoekin bat etorriz.

Prozesu horren azken helburua da Europako kalitatea egiaztatzeko ardura duten erakundeek irizpide eta prozedura berak izatea eta irizpide eta prozedura horiek publikoak eta gardenak izatea, horrela, agentzia desberdinek egindako ebaluazio-prozesuek elkarri balioa onar diezaioten.

Euskal Unibertsitate Sistemaren Kalitatea Ebaluatu eta Egiaztatzeko Agentzia irizpide eta zuzentarau horietara egokitzeko, nahitaezkoa da agentzia horren legezko araubidea aldatzea, Agentziarentzako berriazko lege baten bidez. Horri esker, Agentziaren independentziari buruzko irizpidea beteko da, gobernu-eginkizunak eta ebaluazio-eginkizunak bereiziko baitira, eta Agentziak, goi-mailako hezkuntzaren esparruan kalitatea bermatzeari dagokionez, hezkuntza arloko agintariak aholkatzeko organo gisa daukan zeregina sendotuko baita.

Bestetik, beharrezkoa da Lege hau egitea, Europako Goi-mailako Hezkuntza Esparrua sortzean, goi-mailako irakaskuntzan kalitatearen bermea bultzatzearekin batera, ebaluazio-, egiaztapen- eta ziurtapen-eginkizunek hartu duten garrantzia azpimarratzeko.

Dagoen arauditik abiatuta, betebehar batzuk sartu dira *Europako Goi-mailako Hezkuntza Esparruan kalitatea bermatzeko irizpideekiko eta jarraibideekiko* konpromisoa erakusteko.

Lege honetan aldatu egin da Agentziaren izena, eman zaizkion eginkizunekiko konpromisoa agerian uzteko; izan ere, irakasleen eta titulazioen egiaztapenari eta ziurtapenari dagozkionak baino eginkizun gehiago ditu Agentziak.

Gizarteari kontuak eman beharri buruzko erreferentzia bat sartu da, jarduera-eremua zabaldu da Europako Goi-mailako Hezkuntza Esparruaren eta Europako Ikerketa Esparruaren barruan, eta argiago definitu dira eginkizunak.

Ebaluazio-jardueraren eta kontuak emateko prozeduraren funtsezko printzipioak jasotzen dituzten bi artikulua sartu dira, horiekiko konpromisoari lege-maila emateko.

Gobernu-eginkizunak eta ebaluazio-eginkizunak bereiziz, Agentziak bere ebaluazio-zereginetan izan behar duen independentzia-printzipioa bete nahi da. Horrela, Gobernu Kontseiluak unibertsitateen eta Eusko Jaurlaritzaren ordezkariak izango ditu, eta Agentziaren gobernamentu estrategikoaz eta helburuen definizioaz arduratuko da. Bestetik, Aholku Batzordea ebaluazioa planifikatu eta antolatzeaz eta erabaki estrategikoak garatzeaz arduratuko da.

Agentziaren organoen osaera aldatuta, Euskal Unibertsitate Sistema kanpora begira irekiagoa izatea lortu nahi da. Era berean, ikasleek Agentziaren organoetan parte hartuz, bete egiten da ENQAK bere kideei emandako beste gomendioetako bat. Azkenik, Lege honek, Agentziako organoen osaerari dagokionez, gizon eta emakumeen berdintasunari buruzko legerian ezarritakoa jasotzen du.

1. artikulua.- Izaera eta araubide juridikoa.

1.- Euskal Unibertsitate Sistemaren Kalitatea Ebaluatu eta Egiaztatzeko Agentzia, hemendik aurrera, UNIBASQ - Euskal Unibertsitate Sistemaren Kalitate Agentzia deituko da.

2.- Agentziak zuzenbide pribatuko ente publiko gisa betetzen ditu bere eginkizunak; unibertsitate-gaietan eskumenak dituen Eusko Jaurlaritzako sailari atxikita egongo da, eta berezko nortasun juridikoa

eta jarduteko gaitasun osoa izango ditu, bai eta bere eginkizunak betetzeko berezko ondarea ere, lege honetan ezarritakoarekin bat etorritz.

3.- Agentziaren estatutuak Eusko Jaurlaritzaren dekretu baten bidez onartuko dira, unibertsitate-gaietan eskumena duen sailburuak proposatuta. Estatutuek hau zehaztu beharko dute, gutxienez: Agentziako gobernu-organoen eginkizunak, organo-egitura, jarduteko arauak, haren egintzen aurka jotzeko araubidea, haren ondare-erantzukizunaren araubidea eta Gobernuari eta gizarteari kontuak emateko prozedurak.

4.- Agentziaren jarduera, kanporako harremanetan, oro har, zuzenbide zibilaren, merkataritza-zuzenbidearen eta lan-zuzenbidearen pean egongo da, ebaluazio-, egiaztapen- eta ziurtapen-egintzetan eta ahal publikoak erabiltzea dakarten egintzetan izan ezik, horiek zuzenbide publikoaren pean izango baitira.

2. artikulua.- Xedea.

1.- Agentziaren xedea da euskal unibertsitate-sistemaren baitan kalitatea ebaluatu, egiaztatu eta ziurtatzea, Espainiako, Europako eta nazioarteko esparruak aintzat hartuta.

2.- Era berean, Europako Goi-mailako Hezkuntza Esparruaren barruan, Agentziak ebaluazio-, egiaztapen- eta ziurtapen-jardueretan parte har dezake, Euskal Autonomia Erkidegotik kanpoko unibertsitateen eta goi-mailako hezkuntzako zentrozen esparruan, baina kasuan kasuko akordioak sinatu ostean Euskal Autonomia Erkidegoaz kanpoko beste agentzia, unibertsitate edo hezkuntza arloko agintaritzekin.

3.- Agentziak Zientzia, Teknologia eta Berrikuntzarako Euskal Sistemaren beste jarduera eta eragile batzuen ebaluazioan parte hartu ahal izango du. Era berean, Agentziak eginkizun berberak Euskal Autonomia Erkidegotik kanpo bete ahal izango ditu, Europako Ikerketa Esparruaren barruan, baina kasuan kasuko akordioak sinatu ostean Euskal Autonomia Erkidegoaz kanpoko beste agentzia, unibertsitate edo hezkuntza arloko agintaritzekin.

4.- Agentziak lankidetzarako, ebaluazio-prozesuak aitortzeko, egiaztatzeko, ziurtatzeko eta informazio-trukerako harremanak ezarri ahal izango ditu autonomia-erkidegoetako, Estatuko edo atzerriko beste agentzia batzuekin, goi mailako hezkuntzaren kalitatea ebaluatu, egiaztatu eta ziurtatzeko eginkizunak badituzte.

3. artikulua.- Xedea eta eginkizunak.

1.- Agentziaren eginkizunak aurrera eramatean, helburu hauek lortu nahi dira:

a) Euskal unibertsitate-sistemaren esparruan kalitatea sustatu eta bermatzea, Espainiako, Europako eta nazioarteko esparruak aintzat hartuta.

b) Euskal unibertsitate-sistemaren kalitatea hobetzen laguntzea.

c) Gizarteari Agentziak garatutako jardueren emaitzen berri ematea.

d) Administrazio publikoei, unibertsitatei eta beste eragile zientifiko-teknologikoei informazioa eta irizpideak ematea, Agentziak dituen eginkizunen gaineko erabakiak hartzeko prozesuetan.

2.- Agentziak, bere helburua lortzeko, eginkizun hauek beteko ditu, indarrean den legeriak ematen dizkion eskumenekin bat etorritik, Eusko Jaurlaritzaren eta beste ebaluazio-agentzia batzuen eskumenak errespetatuz eta unibertsitate-autonomia errespetatuz:

a) Irakasleak eta ikertzaileak ebaluatzea eta egiaztatzea ematea.

b) Unibertsitate-ikasketak ebaluatzea.

c) Ikerketa-jarduera ebaluatzea.

d) Erakundeak ebaluatzea eta ziurtagia ematea.

e) Euskal unibertsitate-sistemaren kalitateari buruzko gaietan aholkuak ematea.

f) Agentziaren helburuarekin lotuta dagoen eta bere jardura-esparruaren barruan dagoen beste edozein eginkizun, baldin eta unibertsitate-gaietan eskumena duen sailak agindutakoa bada edo Agentziak bere kabuz betetakoa bada.

4. artikulua. Ebaluazioaren printzipioak.

1.- Agentziak betetzen dituen ebaluazio-, egiaztapen- eta ziurtagi-prozesuak etengabe egokitu behar dira gizartearen eskarierara, unibertsitate-jardueraren kalitate-betekizun iraunkorretara eta Goi-mailako Hezkuntza etengabe hobetzera, Europako kasuan kasuko Esparruaren barruan.

2.- Agentziak, ebaluazio-, egiaztapen- eta ziurtagi-jarduerak betetzean, independentzia eta objektibotasun osoz jardun behar du.

3.- Erabili beharreko irizpideak eta prozedurak Agentziak finkatu eta argitaratuko ditu, eta objektiboak eta nazioartean erabiltzen direnekin bat datozenak izango dira.

4.- Ebaluazio-batzordeek independentzia osoz jardun behar dute eta ebaluazioen emaitzak ezin ditu Agentziaren beste ezein organok aldatu.

5.- Ebaluazio-protokoloak, erabili beharreko irizpideak eta ebaluazio-batzordeen osaera ebaluazio-prozesuen deialdia egin aurretik jakinarazi behar dira.

6.- Jardueren objektibotasuna eta inpartzialtasuna bermatzeko, Agentziak etika-kode publiko bat ezarriko du.

7.- Agentziak hartu beharreko neurriak hartuko ditu, aurkezten diren eskaerak behar bezala ebaluatuko direla bermatzeko, eskaeren hizkuntza ofiziala edozein izanik ere.

5. artikulua.- Kontuak ematea.

Egindako lanaren emaitzen berri eman behar die bere barne-organoei Agentziak, Eusko Jaurlaritzari eta, orokorrean, gizarte osoari. Kontuak emateko prozesua gauzatzeko, honako hauek egingo dira gutxienez:

1.- Agentziak hainbat urtetarako programa-kontratu bat sinatuko du unibertsitate-gaietan eskumena duen Eusko Jaurlaritzako sailarekin. Kontratu horretan Agentziaren finantziazioa ezartzen da, helburu batzuk betetzearekin lotuta. Agentziak, urtero, gastuen berri eman eta aipatutako helburuak noraino bete diren jakinaraziko du.

2.- Agentziak, urtero, txosten bat egin eta argitaratuko du, eta horren barruan kudeaketa-plana eta plan hori bete den aztertzeko lana argitaratuko da.

3.- Urtero, kontuen kanpoko auditoria bat egingo da, eta emaitzak argitaratu egingo dira.

4.- Ebaluazio-, egiaztatze- eta ziurtatze-prozesuen emaitzak argitaratu egingo dira, datuen babesari buruzko araudia errespetatuz.

5.- Agentziari, bost urterik behin, kanpo-ebaluazio bat egingo zaio.

6. artikulua.- Egitura.

1.- Agentziaren gobernu-organismoak Gobernu Kontseilua eta Zuzendaria dira.

2.- Organo zientifiko-teknikoak Aholku Batzordea eta Ebaluazio-batzordeak dira.

3.- Agentziako organo guztietako kideak aukeratzean, gizon eta emakumeen presentzia orekatua izatea bultzatuko da, sexu bakoitzeko kideak gutxienez % 40 izatea bermatu dadin.

4.- Agentziako organo guztietako kideek gaitasun eta prestakuntza egokia izan beharko dute dituzten egitekoak aurrera eramateko.

5.- Gobernu-organismoetan eta organo zientifiko-teknikoetan egotea bateraezina da Agentziak ebaluatu ditzakeen erakundeetan kide bakarreko kudeaketa-karguak izatearekin, Euskal Unibertsitate Sistemako unibertsitateetako hiru errektoreen kasuan izan ezik, 7. artikuluan esaten denaz bat.

6.- Agentziako organoetako kideek beren izenean jarduten dute, beren irizpidearekin, ez beren kolektiboaren ordezkari gisa.

7.- Agentziaren gobernu-organoetako kide diren pertsonen karguak utziko dituzte ondorengo egoeretakoren bat gertatzen denean:

- a) Agintaldia amaitzen denean.
- b) Uko egitean.
- c) Ezintasun iraunkorren kasuan edo heriotzazatik.
- d) Bateriaezintasun sortuberriazatik.
- e) Eginkizunak eta betebeharrak modu larrian, behin eta berriz eta nahita ez betetzeazatik.

7. artikulua.- Gobernu Kontseilua.

1.- Hauek osatzen dute Gobernu Kontseilua:

- a) Lehendakariak; Eusko Jaurlaritzan unibertsitate-gaietan eskumena duen saileko sailburua, edo hark eskuordetzen duena, izango da lehendakaria.
- b) Eusko Jaurlaritzan unibertsitate-gaietan eskumena duen saileko sailburuordeak, edo hark eskuordetzen duenak.
- c) Agentziaren Zuzendariak.
- d) Euskal Unibertsitate Sistemako unibertsitateetako errektoreak.
- e) Euskal Herriko Unibertsitateko errektoreak izendatutako pertsona batek (merezimendu akademiko nabarmenak izan beharko ditu).
- f) Unibertsitateen Euskal Kontseiluak izendatutako sei pertsonak; Kontseiluko kideen hiru bostenen gehiengoak izendatu beharko ditu. Izendatutako pertsonen artean kontuan izan behar da:
  - Izendatutako sei pertsonetatik hiruk Euskal Autonomia Erkidegotik kanpo egin behar dutela lan, eta hiru horietako batek, gutxienez, Espainiatik kanpo.
  - Izendatutako sei pertsonetatik bik unibertsitate-esparrutik kanpo egin behar dutela lan.

2.- Kontseilua osatzen duten pertsonen ezin dute inolako ebaluazio-, egiaztapen- edo ziurtapen-zereginik bete Agentzia honetan.

3.- Gobernu Kontseiluari dagokio Agentzia gobernatzea arlo estrategikoari eta egitura-arloari

dagokienez. Hona hemen eginkizun zehatzak:

- a) Agentziaren estatutuen proposamena idatzi eta onartzea, behin betiko onar daitezen, lege honen 1.3. artikuluan ezarritakoaren arabera.
- b) Agentziaren zuzendaria izendatzea.
- c) Agentziaren zuzendariak proposatuta, aukera izango du zuzendariaren alboko bat izendatzeko, eta pertsona horren egitekoa Agentziako langileen koordinazioaz eta Agentziaren zuzendariak emandako eginkizunez arduratzea izango da.
- d) Agentzia gobernatzea eta plan estrategikoa eta urteko kudeaketa-plana onartzea.
- e) Agentziaren aurrekontuen aurreproiektua onartzea.
- f) Aholku Batzordeko kideak izendatzea eta, hala behar duenean, kargutik kentzea, zuzendariak proposaturik.
- g) Lege honek ematen dion beste edozein, edo Agentziako beste organo batzuei berariaz esleitutakoak ez direnak, baldin eta Agentziaren gobernu-ildo estrategikoekin zerikusirik badute.

4.- Agentziaren Gobernu Kontseiluko kideak hiru urterako izendatuko dituzte, eta bialdi jarraitutan egoteko aukera izango dute, salbu eta izendapen hori duten karguaren ondoriozkoa bada. Bestalde, ezin izango dituzte nahierara kargutik kendu.

8. artikulua.- Zuzendaria.

1.- Zuzendaria Agentziaren Gobernu Kontseiluak izendatuko du, lehendakariak proposatuta, lau urterako, gaitasuna eta esperientzia kontuan hartuta. Izendapen hori beste aldi batez luzatzeko aukera egongo da, lehendakariak hala proposatzen badu eta Agentziaren Gobernu Kontseilua ados baldin bada.

2.- Agentziaren zuzendari kargua zuzenbide pribatuko ente publiko baten zuzendaritzako kargu bati dagokiona da, eta ondorioz, zuzendaritzako erantzukizunak hartu eta Agentziako lanetan erabateko dedikazio eskusiboa izatea eskatzen du.

3.- Hauek dira zuzendariaren eginkizunak:

- a) Agentziaren zuzendaritzaz arduratzea esparru guztietan.
- b) Agentzia ordezkatzeko.
- c) Gobernu Kontseiluaren akordioak betearaztea, Aholku Batzordearen gomendioen jarraipena egitea eta ebaluazio-batzordeen erabakiak garatzea.



d) Aholku Batzordeko kideak proposatzea eta ebaluazio-batzordeetakoak izendatzea, Aholku Batzordeak proposatuta.

e) Lege honetan, edo legearen arauzko garapenean, esleitzen zaion beste edozein, edo Agentziako beste organo batzuei berariaz esleitutakoak ez direnak, baldin eta Agentziaren zuzendaritzarekin zerikusia badute.

4.- Zuzendaria ezin izango du Gobernu Kontseiluko lehendakariak kargutik nahierara kendu, agintaldia indarrean duen artean.

9. artikulua.- Aholku Batzordea.

1.- Aholku Batzordea Agentziaren zuzendariak (batzordearen buru izango da) eta unibertsitatearen eta ebaluazioaren esparruan ospe handia duten zortzi-hamar pertsonak, Agentziaren Gobernu Kontseiluak izendatutakoak, osatuko dute. Kide horietako gehienek Euskal Unibertsitate Sistematik kanpokoak izan behar dute, eta gutxienez ikasle batek eta kideetako hiruk Espainiatik kanpo bete behar dituzte beren zereginak.

2.- Aholku Batzordea organo zientifiko-teknikoa da, eta bere eginkizuna Agentziaren jardueren kalitatea eta sinesgarritasuna bermatzea da. Hona hemen Aholku Batzordearen eginkizun zehatzak:

a) Gobernu Kontseiluari eta Agentziaren zuzendariari eginkizunak betetzeko aholkuak ematea.

b) Agentziak erabili beharreko ebaluazio-irizpideak eta protokoloak onartzea. Irizpide horiek objektiboak, publikoak eta Goi-mailako Hezkuntzaren Europako Esparruan erabiltzen direnekin homologatzeko modukoak izan beharko dute.

c) Agentziaren zuzendariari proposamenak aurkeztea, ebaluazio-batzordeetako kideak izendatu eta, hala beharko balu, kargutik kentzeko.

d) Ebaluazio-, egiaztapen- eta ziurtapen-prozesuak inpartzialak eta objektiboak izan daitezen zaintzea.

e) Lege honek ematen dion beste edozein, edo Agentziako beste organo batzuei berariaz esleitutakoak ez direnak, baldin eta ebaluazio-prozesuekin zerikusia badute.

3.- Aholku Batzordeko kideak gehienez ere hiru urterako izendatuko dituzte. Batzorde horretako kideak berritzeko, bi urtean behin ehuneko berrogeita hamar aldatuko dituzte.

10. artikulua.- Ebaluazio-batzordeak.

1.- Ebaluazio-batzordeak organo zientifiko-teknikoak dira, eta horien bidez garatzen ditu Agentziak ebaluazio-, egiaztapen- eta ziurtapen-prozesuak.

2.- Honako hauek osatzen dituzte Ebaluazio-batzordeak:

- Ospe handiko akademikoek. Batzorde bakoitzean gehiengoa izan beharko dute Euskal Unibertsitate Sistematik kanpoko akademikoek.

- Ebaluatu beharreko arloetako ikasleek, ikasleen gaineko eragin zuzena duten programa eta jardueretan.

- Ebaluatu beharreko arloetako ospe handiko profesionalek, titulazioak ebaluatzen dituzten programetan.

3.- Ikasleek eta profesionalek ebaluazio-jardueretan nola parte hartuko duten arautzen du Agentziak, zein programatan parte har dezaketzen zehaztuz. Ikasleen kasuan, bermatuta izan beharko dute ebaluaketa instituzionalean eta irakasgaienetan behintzat parte hartu ahal izatea, eta ezin izango dute parte hartu irakasleen, ikertzaileen eta administrazio eta zerbitzuetako langileen ebaluaketa eta egiaztapena egitean.

4.- Ebaluazio-batzordeetako kideak hiru urterako izendatuko dituzte, eta ezin izango dituzte berriz izendatu kargua uzten dutenetik hiru urte igaro arte.

11. artikulua.- Agentziako langileak.

1.- Agentziak bere langileak bere kabuz kontratatzen, kudeatzen eta prestatzen dituen ardura dauka.

2.- Hauek dira Agentziako langileak:

a) Agentziako bertako langileak, lan-zuzenbidearen arabera kontratatutakoak, berdintasun-, merezimendu- eta gaitasun-printzipioak errespetatuz.

b) Euskal Autonomia Erkidegoko administrazio publikoko langileak eta Espainiako unibertsitate publikoetako langileak, Agentziari atxikitakoak.

12. artikulua.- Finantzaketa.

1.- Agentziak bere aurrekontua dauka, bere kabuz kudeatzen duena, Euskal Autonomia Erkidegoari dagokion araudiarekin bat etorriz.

2.- Euskal Autonomia Erkidegoko aurrekontuetan, Agentziari bere eginkizunak betetzeko behar dituen baliabideak esleituko zaizkio. Hainbat urtetarako programa-kontratu baten bidez ezarriko dira baliabide horiek. Dena dela, beste diru-sarrera batzuk ere eduki ahal izango ditu, bere jardueretatik ateratakoak barne.

3.- Agentziak, bere jarduerak betetzean, ezin izango du, inolaz ere, ebaluatu behar dituen erakundeetatik dirurik jaso, non eta ez diren ebaluazioak, egiaztapenak eta erakunde horiek agindutako beste zerbitzu batzuk ordaintzeko ezar daitezkeen tasa edo prezioak.

4.- Lege honetan Agentziarentzat ezarritako araubide juridikoarekin bat etorritz, Agentziaren funtzionamendu ekonomiko eta finantzarioa eta diru-kontuen kontrola Euskal Autonomia Erkidegoari dagokion araudiaren araberakoak izango dira.

13. artikulua.- Ondarea.

Euskal Autonomia Erkidegoak Agentziari, eginkizunak betetzeko, behar dituen ondasunak eta ondarea atxikiko dizkio.

Agentziaren ondarea Euskal Autonomia Erkidearen ondarearen zati da, eta ondare horri ezartzekoa zaion araudiak arautzen du.

#### **XEDAPEN GEHIGARRIA**

Euskal Unibertsitate Sistemaren otsailaren 25eko 3/2004 Legean edo beste xedapen batzuetan Euskal Unibertsitate Sistemaren Kalitatea Ebaluatu eta Egiaztatzeko Agentziari egindako arau-erreferentzia guztiak UNIBASO - Euskal Unibertsitate Sistemaren Kalitate Agentziari egindakotzat joko dira.

**XEDAPEN IRAGANKORRA.**- Agentziaren organoen osaera.

Agentziaren organoak lege hau argitaratu eta hiru hilabeteko epean egokituko dira lege honetan ezarritakora.

## **XEDAPEN INDARGABETZAILEA**

Indarrrik gabe geratuko dira:

- a) Euskal Unibertsitate Sistemaren otsailaren 25eko 3/2004 Legearen 79tik 88ra bitarteko artikulak.
- b) Lege honetan ezarritakoaren aurka dauden gainerako xedapen guztiak.

## **AZKEN XEDAPENA**

Lege hau argitaratu eta sei hilabeteko epean, legea garatzen duen araua idatziko da, eta UNIBASQ – Euskal Unibertsitate Sistemaren Kalitate Agentziaren estatutuak egokituko dira.